

Til alle abonnentar

Vår ref.: 22/00287

Dykkar ref.;

Førde: 30.6.2022

Informasjon om matsortering

I samband med regjeringa si endring av avfallsforskrift (*utsortering av bioavfall og plastavfall*) kapittel 10a. *utsortering og materialgjenvinning av enkelte avfallstypar*, vil de snart få utlevert dunk med grønt lokk til matavfall. Vi deler samstundes ut oppsamlingskorg med lufthol til å ha på kjøkkenet, og ein bunt med papirposar spesiallaga for oppsamling av matavfallet. Dette skal normalt halde i 4-5 månader.

Det nye kravet gjeld både hushald og næring med hushald-liknande avfall. Hushald får dunkar automatisk, mens næringsaktørar må sjølv bestille matdunkar. Ved avtale om heimekompostering vil du ikkje få eigen dunk til matavfall. Det vert ikkje gjeve tilbod om ordninga for matavfallsdunk til hytter.

Dersom ein allereie har fått utlevert dunk for matavfall kan ein sjå vekk frå dette skrivet.

Kva skjer no?

- Frå medio juli startar vi med utsetjing av ny dunk til matavfall, du vil bli ytterlegare varsla ved oppstart i din kommune. Sjå også <https://www.sum.sf.no/matavfall>
- Dunkane vi deler ut er 140 l. For fellesanlegg kan vi vurdere andre størrelsar.
- Innsamling av matavfallet vil ikkje starte før alle dunkane er delt ut. Du skal difor ikkje starte å sortere matavfallet når du har motteke matavfallsdunken. Du vil bli varsla med SMS **når du kan starte** å sortere matavfallet.
- Matavfall og restavfall vert deretter henta inn kvar 14. dag. Nærmare informasjon om dette kjem til hausten saman med ny tømmekalender.
- I denne omgang vil ordninga med matavfallsdunk ikkje medføre gebyrendring
- Burettslag, sameige og andre med større samle plassar og avfallshus/rom eller andre fellesanlegg kan velje botntømt avfallsløysing som alternativ til dunkar. Nærmare info om dette finn de på vår heimeside, <https://www.sum.sf.no/burettslag-og-sameie>. Desse er både plassbesparande og gir redusert luktulempe. Ta kontakt via web-skjema dersom de vurderer slik løysing.

Vi ber om forståing for at vi ikkje kan svare kvar av dykk eksakt på når dunk blir utlevert, men vi skal forsøke å halde dykk informert om tidsrom. Oppdatert utleveringsplan kan de sjå på heimesida vår. Der legg vi ut status fortløpande, både kva område som har fått dunk, og framdriftsplan på vidare utsetting.

Næringskundar

Vi leverer i første omgang berre ut til hushald. Næringskundar som ønskjer eigen dunk til matavfall kan melde dette inn til SUM. Det gjer de på webskjema på vår heimeside, <https://www.sum.sf.no/nering>. Bestillinga blir då registrert, og vi vil komme tilbake med nærmare info.

Kommunar

SUM sine eigarkommunar vil få eige brev. Einingar, som til dømes skular og barnehagar, aldersheimar o.l. som er tilknytt eigarkommunane, må i samråd med kommunen avgjere kva type dunkar og volum ein har behov for. Kommunen må deretter lage ei samla bestilling for behov for matdunkar til SUM.


Alle dunkar skal merkast med elektronisk brikke

I samband med utdeling av matavfallsdunkane skal også alle restavfalls- og papirdunkar merkast med ei elektronisk ID-brikke og ein etikett med strekkode og adresse. Merkinga skjer for å få betre oversikt over renovasjonen. Når dunken er tømmd, vil ID-brikka bli skanna og tømminga registrert som utført av renovasjonsbilen. Dunkane blir merka same dag matavfallsdunkane blir utlevert.

Gebyr- og kompostkontroll

Vi vil i samband med merking av behaldarar gjennomføre kontroll av gebyr og varmkompostbingar. Dersom du har fått innvilga kompostrabatt men ikkje lenger komposterer, kontakt sum@sum.sf.no så fjernar vi rabatten utan tilbakeverkande kraft. I så tilfelle vil du få utlevert ein matavfallsdunk.

Med venleg helsing



Henning Tjørhom
Dagleg leiar
Sunnfjord Miljøverk IKS

For meir info, sjå www.sum.sf.no.

Kjelde: <https://lovdata.no/dokument/LTI/forskrift/2022-06-07-971>

Vedlegg: Informasjon om matsvinn, matavfall og tips for å redusere faren for søl

Korleis redusere matsvinnet?

Mat som kunne vore ete, men som er kasta, vert rekna som matsvinn. Å unngå å kaste eteleg mat er betre for miljøet enn kjeldesortering av matavfall.

Analyser viser at 60 prosent av matavfallet frå hushald kunne vore ete. Vi kastar mest bakevarer, frukt og grønt samt middagsrestar.

TIPS FOR Å UNNGÅ MATKASTING:

- Tilpass innkjøpa betre
- Berekn porsjonane meir nøye. Gode porsjonsguidar finn ein på matvett.no og matprat.no
- Oppbevar maten riktig. Bakevarer bør ikkje oppbevarast heilt lufttett, i motsetnad til kjølevarer. Lufttette boksar er fine å bruke til kjølevarer som middagsrestar.
- Hald kjøleskap og andre matskap og -skuffer ryddige og oversiktlege. Den største årsaka til matsvinn er at vi gløymer det vi har i skapa.

SLIK SORTERER DU MATAVFALLET:

Ja, takk!

- Skrell og skrottar frå frukt og grønsaker
- Brød og bakevarer som ikkje kan etast
- Anna matavfall utan emballasje
- Fiskebein og -skinn
- Mindre bein
- Kaffifilter og -grut (bør tørke)

Nei, takk!

- Plast- og bioposar
- Mat i emballasje
- Flytande restar som supper og sausar (må i restavfallet - ikkje avløp)
- Store kjøtbein og slakteavfall
- Hageavfall, jord og blommar
- Bleier
- Kattesand og dyreekskrement
- Eingongskrus og -bestikk

Obs: Ikkje ta plastpose eller biopose utanpå papirposen!

Praktisk rettleiing om matavfall



KVA GJER EG FOR Å UNNGÅ AT DET LUKTAR AV MATAVFALLET?

Bruk korga med luftehol som du får av SUM, eller tilsvarende. Ikkje legg matavfall i ein lukka behaldar på kjøkenet. Ein lukka behaldar gjer at matavfallet byrjar å rotne raskt og luktar. Luftehola gjer til at matavfallet vert mindre fuktig og dermed rotnar saktare.



KORLEIS UNNGÅR EG SØL INNE OG AT MATAVFALLSDUNKEN UTANFOR VERT TILGRISA?

Dersom matavfallet er fuktig, aukar sannsynet for tilgrising. Unngå å helle væsker som supper og sausar i matavfallet. La kaffigruten dryppe seg ferdig før du kastar den i papirposen. Ikkje la posen verte for full før du går ut med den, men sørg for at det er mogleg å pakke den godt saman før du legg den i matavfallsdunken ute.



KOR SKAL EG LEVERE MATAVFALLET MITT?

Dersom du har eigen dunk til matavfall, set du dunken fram på vanleg oppsamlingsplass på tømmedag. Hugs å setje dunken fram før kl. 07.00 og trekk det tilbake etter tømming. Vi køyrer fram til kl. 19.00. Dersom du deler dunk med andre og det er sortering av matavfall i ditt bustadområde, får de ved avfallsløysinga ein felles dunk, container eller nedkast til matavfall.



KVA SKJER VIDARE MED MATAVFALLET?

Utsortert matavfall skal nyttast på ein måte som gjer at ressursane ikkje går tapt. Målet er at matavfallet skal gje bioenergi og nyttast som jordforbetningsmiddel. Dette vil igjen redusere bruken av kunstgjødsel. SUM vil skaffe tenesta i nærliggande områder i første omgang, og arbeider med å få til ei lokal løysing på sikt.